

Omm Telefon

Also naa, wenss dess Telefon nitt gewwe deet, was deede merr sunnst unn hauptsächlich in dene Coronazeide mache. Su kann merr, aach wenn merr dehoom mett de Fraa innere selbstgewählde Quarantäne lewe dut, immer mol mett oom redde, mett moim ahle Kumbel Hubert zum Beispill. Also habb isch den omm letzde Sonn-daach oogerufe unn isch muss saache, der hott sisch rischdisch gefreit.

Lieber Hannes, hodder gesaad, schön dass Du anrufst. Ich wollte mich schon die ganze Zeit über bei dir melden, aber ich hatte seit Neujahr so einige Arzttermine und die Ärzte beschäftigen mich doch sehr.

No, saach isch, was hosde donn, Hubert? Alls dess mett doine Aache?

Doo gibbder ze Antwort: Diesmal nicht. Ich habe so sonderbare Schmerzen in beiden Beinen und bin deshalb in der Röhre gewesen, es ist ...

Ess iss de Spinalkanal, habb isch gesaad, odder?

Emm Hubert soi Stimm war e bissi leise: Genau, der Spinalkanal.

Unn, frooch isch, werdd ebbes gemachd?

De Hubert druff: Lieber Hannes, ich muss mich in meinen alten Tagen noch operieren lassen, aber zurzeit, mit diesem Corona überall, werde ich es aufschieben so lange es geht.

Isch habb ins Telefon geniggd. Wenssde dess uffschiewe konnsd, donn isses sicher besser.

Lassen wir das, seeder donn, Hannes, willst du nicht wieder einmal in meine Nähe kommen? Am Niederrhein sind Zehntausende von nordischen Gänsen. Du und deine Frau seid doch schon mal dort gewesen, oder?

Ja, saach isch, mir hawwe e bissi außerhalb vunn Kalkar schee gewohnt, warn in Wesel unn in Xanten, unn sinn jeden Daach de Rhoi enuff unn enunner gefahrn unn warn aach uff de Bislicher Insel. Zehdausende vunn Gäns, hauptsächlich Blässgäns unn Graugäns, awwer aach onnern Gäns, hawwe merr in de Luft unn uff de Wisse geseh unn dene ihr Geschnatter war nitt ze iwwerheern. Schee wars, awwer jetz fahrn merr nimmi su weit unn brauches aach nitt, weil driwwe im Ried, hinner Trewwer, sinn ...

De Hubert hott misch unnerbroche: Hinter was, Hannes?

Isch habb gelachd. Hinter Trebur. Dort sinn jetzt im Winder aach Dausende vunn nordische Gäns uff de Felder ze seh, awwer aach Nilgäns sinn debei, unn weiters aach Hunnerde vunn Höckerschwän. Grad die Gäns: Wennde uff de Strooß longsom meddem Audo onn dene vorbeifahrn dust fresse se weider, awwer wenn de oohalle dust, zeische se derr de Dotsch unn watschele fort. Jetz noch ebbes: Vorsjoir hawwe merr e Gons geseh, die mir fremdardisch vorkumme iss. Isch habbse fotografiert, habb dehoom im Buch noochgeguggd unn dess war e Streifegons, mett zwaa dunkele Streife omm weiße Kobb unn emm weiße Streife omm Hals. Su e Gons iss eischendlich in Asien dehoom, doch die mir geseh hawwe, kann aus emm Zoo odder aus emm Voochelpark abgehauwe soi. Also ess gibt im Ried immer ebbes ze gugge, aach im Winder.

Doo seed de Hubert: Hannes, es freut mich, dass du immer noch Interesse am Federvieh hast. Auf deiner Homepage finde ich ja auch immer wieder mal Fotos von Vögeln. Mach' so weiter, mein Freund, und bleibe gesund,

Du aach, Hubert, saach isch, unn bass uff disch uff.